

沈雲龍選輯

明清史料彙編

第七集

第八冊

文海出版社

有限公司印行

嶧桐詩集卷第一

二妙集三十八

貴池劉城伯宗著

風雅體 巳丑

靈鳥

靈鳥閔賢也

倬彼靈鳥匪以司晨有如服箱不以命輿豈惟不可抑亦不任

工擇大木喜棟之隆匠斲而小維木之窮木之窮兮室安崇今

亦有奔走亦有禦侮穆穆師保惟帝之輔而以執鼓誰其建侯大啟爾宇

天之方蹶則匪其躬執父匪任亦罔有功袞衣躋棘莫歸我公彼其之子狐裘蒙戎

靈鳥四章二章章六句一章七句一章八句

鹿力

鹿呦呦友也

鹿之呦呦兮行呼其儔豈必得食同黨遨遊吁嗟兮不我偕游
鳳兮朋兮其文一兮有苞有翼宜其匹兮吁嗟兮不我卒匹
鹿呦二章章五句

魚潛

魚潛愍生也

魚潛于沼亦自言深有沸其釜以待我羹
鳥集于林亦自言安有矯其弋登我于盤
昔日之日曷不敢死有其在者今已焉矣
今日之日死于何處皇皇謀生誰與生女

魚潛四章章四句

狐之豐

狐之豐愍時也

狐之豐兮則蒙茸兮匪家於野而入宮兮

梟之大兮母則禍兮既乳哺之而死以爲賀兮

明明上天日兮月兮今曷往兮闕然沒兮

以風以雨以雪以霜芒芒禹迹不可以疆我安適爲鄉

狐之豐四章三章章四句一章五句

冬日

冬日愍哉也

冬之日矣雨雪霏霏夏之日矣凱風亦希嗟此昊天乃覃疾威

誰其干天厥罰不聞而我下民如炙如焚嗟此如焚於我下民

民之暘矣斯飢渴矣我之暘矣疾痛憒矣室交聒矣
廛田圯矣平原赤矣匪無油雲而格其澤哀此中國亦既如
滌

冬日四章三章章六句一章五句

我邁

我邁刺俗也

我邁我友不識之子聽言則是辨貌則否庶見素冠兮俾我
信然兮

我邁我姻不識其親匪帶之垂審爾之音庶見素衣兮俾我
無疑兮

童子執殳伯也佩觿夫也珈服婦則驂驪孰云古是毋曰今
非自北自南自東自西

巷無服馬屋無塗鐔衣無燦繡飲無伏蹲豈其曰無夫人而

能自東自西自北自南

我邁四章二章章六句二章章八句

樂府

庚辰

古樂府指事摘辭其事往矣則情無由動情無由動則辭無由成後之自命優孟非優孟也余于崇禎丙丁戊己閒頗有雜感而分不得言則取古題傳以時事竊比于微而顯怨而不怒亦詩人之意云爾其文則古而其事與義則別余固不爲擬古樂府者也

饒歌

朱鷺

朱鷺翔以武聲蕭蕭羽燁燁不食茹不食魚食敵人顙飲于廟鷺不下將以問懦者

思悲翁

思悲翁翁何之失我碣石高盤螭戰聲合鼓聲死翁桓桓紛
拏殺不已悲翁也狡兔在走狗烹發縱者誰獍鴮邪人貞魂
毅魄安所征

艾如張

艾如張羅置旃于阿田鼠執田豕罹賓鴻哀雁我則那悲乎
大哉聖王之守今若何我鹽諸利出車敵愾

土之回

上之回祠雍畢揚翠旗仗玉琰升高墉閔臨衝羣后擁百靈
降導瀍澗賚宮功昊天說人和同望玉門之外見青海若帶
休屠祭天烏孫膜拜皇帝陛下三萬歲

巫山高

巫山高石巖巖谿水深流相環水日鬻山趾高陵崩以徙岸
谷既移洪流斯瀾昔與爾綢繆今與爾仇讐山川之險使人

心憂欲渡無梁我涕洟雲土夢又待何時

上陵

上陵一何嵯峨干雲蔽日鳥不得過其陽橋山承龍之髯玉衣金枕閼深嚴陰即康居大食龜茲月支相繇連穹廬其趾旃裘眈眈客從何方來云自上食回厓自上食回女見能罷爲守松柏相樛金支翠旗有無風肅肅■伏衣冠出游不將進酒

將進酒舉伯雅爲君壽祝何者君子醴以清小人醴以渾歲穰穰賜大酺葡萄來大夏西池宴王母旣醉備五福人咸無苦

君馬黃

君馬黃臣紫騮君馬有缺臣懷憂駒駉駉相募求大自丞相六卿御史大夫內自蒼伯中車千金買駿百金買駑納之

天閑日食粟與芻不徒食粟與芻單于獵邊塵黑內廐出名
王蹶天子垂淚蒲梢來西極

有所思

有所思乃在燕山之側易水之涯彼美人兮聖性惠辭絕世
獨立心求所知我欲投之結綠縣黎都梁鬱金雜承之有何
王木公老秃且當門諱逐我不敢窺心相思夢與期夢中娛
樂未央起視明河蒼涼彼美人哉相望

雉子斑

雉子斑樂彼芳原稻梁粟堅堅雄飛雌從行啄不已自謂
泰山以安虞人一羅奈何涕泣羅中徒相教勿復過又有小
兒彈石膠竿避不得來萬端其母雲中下視雉子哀無窮原
田膺膺不可與久居

聖人出

聖人出化隆昌屈軼生禱机亡般般來美紛哉日月之表帝
所治屢豐年蠲賦稅脫劔為鐵嬉而犁道不拾遺於皇哉單
于稽顙月支臣狗不吠萬國寧

上邪

上邪我與君相知髮始燥迨結褵父母所命國人知君有他
心見金夫而沈吟弃我中林明明者月照臨反側我不以三
物詛爾斯爾絕我乎則絕

石流

石流涼涼白雲翱翔幽谷蘭生自芳山上有荃不相見申椒
歷亂莫我蘭待時乎時乎揚其芬流沙日出氤氲皇帝澤洽
萬國禪云云禪亭亭

獨漉篇

獨漉獨漉渭清涇濁濁者湯湯清者枯陸莫高匪天莫明匪

月高有不聞明蝕而闕鴻雁哀鳴猛虎怒嘯人畏虎怒孰恤
鴻勞蚊吮血飽螳得羶肥笑彼鳳凰竹實胡為陰雲霾霾朔
風正急禦寒無具我憂孔疾人亦有言勿直如弦寇來矢禦
不直寇前

善哉行

來日大難朝饔夕飧盎有斗粟我心則歡一解彼美之服必
綺與紈我求尺布大風欲寒二解夷以餓死跼膾人肝千秋
萬歲枉有愚賢三解伐鼓淵淵出車輝輝雖有旨酒爵不得
乾四解人世大苦蒿里耽耽誰其游鶴駕鸞驂五解大貪
噉名大躁隱山鬼冒倕佺弄六解丸

西門行

出西門步長數百感紛相會憂來無端一解夫憂來胸春不
得寬欲語將相公卿高門方自尊二解歸蓬戶擁敝裘作書

言世務書奏或相謀三解人命苦易逝功名得久留不自策
高足視我一蜉蝣四解亦知達人如沮溺耦耕避世心所安
亦知達人如沮溺耦耕避世心所安五解南山田不治四體
亦當勤安得遺世事仙人藥一丸六解

東門行

出東門步何遲日暮望而更非僊中有崩緱照我面上有塵
緇一解作客長安久僮僕用相嗤不見驃騎薦士有何平津
脫粟糜二解脫粟糜先啖諸大長秋後飯執金吾兒洛陽年
少輕薄誰堪爾相對太息涕洟三解洛陽年少輕薄誰堪爾
相對太息涕洟出門欲何之東汎海西采薇四解

豔歌何嘗行

何嘗快獨極歡但當射策中籍金門一解丞相安昌侯師戴
崇為門生二解以此拜官顯融或入金馬侍從出牧守令尊

三解但當以中策拜官快獨美田廣宅使勢通奸四解貪亦

可爲廉亦無庸冠蓋相望根株固盤五解男兒重賢才氣勢

安足爲白衣爲三公卿應憶武皇中有之匈奴數大入盜滿

南山陸上慙蒼浪之天下愧高爵厚賞朱纓華轂月請俸錢

不訾問爲誰六解

苦寒行

驅馬燕山道霜重馬蹏裂黃雲蔽天來慘澹知將雪皮皴號
木風裘薄寒難月草枯狐兔藏冰堅車軸折道逢流離人單
衣鶉百結云自三輔奔胡騎近宮闕笳吹肌骨消角奏聲悲
咽白檀易水閒凍血成幟嶮游子在他鄉當寒易凜冽仰天
悲長歎春回何時節

秋胡行

堯用伯鯨殛亦隨之負恩罔續法不可私鴻流泛溢赤縣崩

離一夫佚罰萬命塗泥知人惟艱任人惟危歌以永志我心
孔悲皋陶作士治刑與兵殄壬殲寇惟帝好生

猛虎行

飢不分盜跖膾寒不衷夏姬衣飢寒豈不急志士微尚非薄
俗多聾聵逐臭相因依祝鮀羣情樂冉雍物論譏斑斑白額
虎齧人常苦肥喈喈九苞鳳棲梧常苦飢虎肥多弃肉足飽
狼與狶鳳飢無餘粒野雀別山飛眷彼披裘翁逃名得庶幾
君子行

君子貴其真色取未爲仁言貧莫求富言高莫詘身擊奸莫
畏禍好名莫欺人魯連誠高蹈敝屣擲千金田光竟慷慨勿
頸無逡巡周公稱大聖恐懼對至親

鰕鮒篇

鰕鮒處沮洳自云江海寬蜣螂轉溷廁自命蘇合丸小夫蔽

所見安知天地閒讀書盡境索結袂攬荃蘭俯視營營子行
屍良可歎左顧羅姬姜右顧積金錢挾持通奸利酒宴日盤
桓哀哉爲誰收達者見其然

從軍行

今日從軍樂不問所從誰所從況貴要安坐快無危相公征
襄樊秉鉞受殊知金華前殿接未央左閣酺大官飭玉饌尚
食進金卮文綺賜焜燿長劔授陸麗天章復雲漢王言更綽
絲襃以南仲烈寵以方叔辭衛以羽林卒右以長侍兒貂璫
盛爲輔輜重溢相隨麾下皆饒飫歡欣擊鼓鼙椎牛飲美酒
踟躕或彈棋襄陽自古樂連臂蹋銅蹠上兵自不戰戰亦不
差池上將自不敗敗亦何憂疑彤弓及盧矢又自天子來

對酒

對酒歌愁思雜感亂難治民生憊以悴牧長將帥不稱宜三

輔地 頓出入導引者中行貳師烏飽腐肉澤量僵屍徧
視陸海鉦鼓旌旗山頭遠望廷尉如嬉太守令宰掾史各行
其私以攫取厚貲安復問饑饉流離徵租使鋏急不得遲人
無圖治之策容頭過身日以俟後來謂天蓋高謂地卑冬雷
夏電元日食虧

東光

甘陵平潢池何不平潢池多腐肉不充飢渴腸丈人方秉鉞
河上兩相望

瑩篴引

公無渡河河北賊多賊多猶可兵多奈何

當檣欲高行

高檣欲利待長風尊官欲利待彌縫愚忠朴直難容陰陽上
下令名顯融巍巍棟柱交關在中旦奭徂伏丙魏終念欲排

聞闔獨征無與同

企喻歌

男兒欲作好結交必有人蛩蛩與駟虛相倚始成行
本是白鼻騮奚官不一顧著以錦障泥立買千金去
健兒得快馬行步有輝光罷士衣錦襖嘖嘖亦路旁
可憐無男兒惟有錢交賒男兒嗜錢蟲生死不得誇

折楊柳歌

三度入孟津漢兒顏色少惟有楊柳枝不改前年好
漢兒女太怯馬上不成歌將去臙脂山教兒貌如花
來自玉關道出自薊門口不見玉關榆但折薊門柳
馬上健胡兒控弦號十萬借問若多漢兒實大半
下馬醉酥酪上馬折柳條行盡馮翊南不見漢嫖姚
來時寒草枯去時河柳綠信有神駱駝力不足